

Trais cudeschs novs – in record?

■ **(anr/vi) Quest onn èn vegnids sin fiera gist trais cudeschs novs da Theo Candinas. È quai forsa in record? L'autur da Surrein ha explitgà durant ils Dis da literatura pertge ch'i ha dà questa cumulaziun.** Il crimi «Mysteriöser Unfall eines Politikers am WEF» haja el scrit l'atun avant in onn ed uss saja il cudesch gia sin maisa. Ma i sa tractia la finala d'in cudesch tudestg. Cun cudeschs rumantschs saja quai bler pli grev da vegnir or. Vi da l'ovra «Sils fastitgs dil Gediu perpeten» haja el lavurà var diesch onns. Il manuscript da quest cudesch saja i quatter onns d'ina in-

stituziun rumantscha a l'autra, raquinta Candinas. Lura haja el gi avunda e laschè edir l'ovra d'in editur tudestg.

«In schuldau d'Alsazia en l'Emprema uiara» tractia las regurdanzas da ses sir. Notizias per quest cudesch haja el gia fatg pli baud. Singulas passaschas dal cudesch sajan era stadas publicgadas en il «Calender Rpmontsch».

Il proxim december festivescha Candinas ses 80avel anniversari – per el gina raschun da metter d'in maun la plima. L'onn proxim duess cumparair in cudesch cun poesias.

